

МЕСЯЦА ФЕВРАЛЯ В 1-Й ДЕНЬ

Предпразднство Сретения Господа Бога и Спаса нашего Иисуса Христа. И святого мученика Трифона

На Господи, воззвах: стихиры предпразднства 3, глас 4.

Подобен: Яко добля:

Честная готовится Церковь * восприяти в себе Господа, * яко Младенца приходяща * и благодатию мысленно уясняюща * вернейший свой и Боголюбезный собор. * Сего ради вопиет: * Ты еси слава, и похвала, * и украшение исполнения моего, Слове, * младенствовавший плотию мене ради.

Чертог многосветлый, * и Сень пречестная, * и Храм святой и просторный, * внутрь чертогов вводящий Церкви Господа, * предобручает Себе честней Церкви Его * и молится присно * от тли и бед избавитися * иже воистинну Богородицу * Сию непрестанно славящим.

Предпразднственную хвалу * Христу ныне принесем, * Того славяще сопествие: * яко Девическими руками: яко Младенец приносим, * на руки Симеона возлещи грядет, * воззвание содевая всем человеком * и обожити существо, * яко Благодетель и Господь.

Ины стихиры святого, глас 1.

Подобен: Всехвальнии:

Трифоне всехвальне, * сладости нетленные * причастник на Небесех был еси светлейший, * доблественными подвиги * пострадал еси, славне, * и, свидетель истины быв, * Христа моли * даровати душам нашим * мир и велию милость.

Трифоне преславне, * Света присносущнаго сияньми * световиден весь был еси, * испроверг всю мрачную прелесть * и миродержца тьмы низложив * Божественною благодатию. * Темже моли * даровати душам нашим * мир и велию милость.

Трифоне всеблаженне, * радости и веселия Ангельскаго сподобился еси, * отвергся красных жития, * и, душевною крепостию вся в ничтоже вменив, * терпеливнейше совершил еси мучение, * и молишися о душах наших.

Слава, глас 2.

Киприаново: Преобидел еси суцая на земли, * всеблаженне Трифоне честный, * к судищу мужески потщася * и, борения кровию ты художне, мучениче, гордаго низложив, * приял еси победы венец; * Христа Бога нашего моля о нас, не оскудей, страсотерпче, * спаситися душам нашим.

И ныне, глас тойже.

Германово: Днесь Симеон на руки Господа славы приемлет, * Егоже под мраком первее Моисей виде, * на горе Синайстей скрижали дающа ему. * Сей есть, Иже во пророцех глаголай * и закона Творец; * Сей есть, Егоже Давид возвещает, * Иже всем страшный, * имеяй велию и богатую милость.

На стиховне стихиры, глас 2.

Подобен: Доме Евфрафов:

Восприими, о Симеоне, * Господа славы, * якоже известился еси * от Духа Святаго: * се бо прииде.

Стих: Ныне отпускаеши раба Твоего, Владыко, * по глаголу Твоему, с миром.

Носящи Чистая * и Пречистая Дева * Соделателя и Владыку * яко Младенца на руках, * в церковь входит.

Стих: Свет во откровение языков * и славу людей Твоих Израиля.

Велие и страшное таинство * и странное смотрения: * Иже вся объемляй * и младенцы созидай, * яко Младенец на руках носится.

Слава, и ныне, глас тойже: Самогласен:

Священнаго Священная Дева * принесе во святилище святителю, * простер же руце, Симеон прият Сего, радуясь, и возопи: * ныне отпускаеши раба Твоего, Владыко, * по глаголу Твоему, с миром, Господи.

Тропарь, глас 4:

Мученик Твой, Господи, Трифон, * во страдании своем венец прият нетленный от Тебе, Бога нашего: * имей бо крепость Твою, * мучителей низложи, * сокруши и демонов немощныя дерзости. * Того молитвами * спаси души наша.

Ин тропарь святого мученика Трифона, глас 4:

Пищи Божественныя, треблаженне, * наслаждаяся на Небесех неоскудно, * славящих песньми память твою покрый * и сохрани от всякия нужды, * отжени вредящих нивам животных, * да тебе от любви вопием всегда: * радуйся, Трифоне, мучеников укрепление.

Слава, и ныне.

Тропарь предпразднства, глас 1.

Подобен: Лик Ангельский:

Небесный лик Небесных Ангел, * приник на землю, пришедше зрит яко Младенца, * носима к храму, Перворожденна всяя твари от Матере Неискусомужныя, * предпразднственную убо с нами поют песнь, радующесея.

НА УТРЕНИ

На Бог Господь: тропарь предпразднства, глас 1.

Небесный лик Небесных Ангел, * приник на землю, пришедше зрит яко Младенца, * носима к храму, Перворожденна вся твари от Матере Неискусомужныя, * предпразднственную убо с нами поют песнь, радующеся. [Дважды]

Слава, святого, глас 4:

Пищи Божественныя, треблаженне, * наслаждаяся на Небесех неоскудно, * славящих песнями память твою покрый * и сохрани от всякия нужды, * отжени вредящих нивам животных, * да тебе от любви вопием всегда: * радуйся, Трифоне, мучеников укрепление.

И ныне, предпразднства.

По 1-й кафизме седален, глас 1.

Подобен: Красоте девства:

От Девы Тя воплощенна, Христе, радуяся, подъят священный Симеон,— * ныне отпускаеши, вопия, раба Твоего, Владыко. * Анна же непорочная, пророчица и славная, * ныне исповедание и пение приносит Тебе. * Мы же, Жизнодавче, вопием Ти: * слава тако благоволившему.

Слава, и ныне, тойже.

По 2-й кафизме седален, глас 8:

Подобен: Свирелей пастырских:

Родился еси на земли, Собезначальный Отцу, * принесся еси в церковь, Непостижимый; * радуяся же, старец на руки Тя восприят, зовый: * ныне отпускаеши, егоже посетил еси по глаголу Твоему, * благоизволивый спасти, яко Бог, род человеческий.

Слава, и ныне, тойже.

Канон предпразднства со ирмосом на 8 и святого на 4. Канон предпразднства. Глас 4.

Песнь 1

Ирмос: Моря чермную пучину * невлажными стопами * древний пешествовав Израиль, * крестообразныма Моисеовыма рукама * Амаликову силу в пустыни победил естъ.

Сердца якоже руце вси предуготовльше, приходяща днесь Христа чисте приимем и Того Духом Божественных дарований насладимся.

Двери предъотверзши днесь, иже в законе храм, Законодавцу и Содетелю устрояет входы светлы и готовит честныя дары Ему Божественное хваление.

Воспою Тебе, Господи Боже мой, младенствовавшему плотию, и закону повинувшемуся, и спасшему человека, егоже ради был еси Человек.

Богородичен: Разумев ветхий, Пречистая, храм Тя, Владычице, Владыце всех и Богу жилище чисто лик проповедаше, величая славу Твою.

Ин канон мученика, егоже краегранесие: Сладости причаститися сподоби мя, Трифоне. Глас 8.

Песнь 1

Ирмос: Воду прошел, яко сушу, * и египетскаго зла избежав, * израильтянин вопияше: * Избавителю и Богу нашему поим.

Воистинну Божественныя на Небесех сладости наслаждаяся, яко непобедим страдалец, твоими молитвами душу мою избави от страстей смущения.

Глаголы Божественными огласився, совершил еси сия преславне деятельно, святыню возлюбив и целомудрие обლობызав.

Был еси истинно пастырь, пасый души твоя в мудрости помышления, души обращающа заблуждающа и Богу приводя, славне.

Богородичен: Просвещаеши мя сиянием мысленным, осияние славы рождающая Отчее, Всенепорочная Отроковице, и мрак греховный разори.

Аще есть неделя, Катавасия: Сушу глубородительную землю:

Песнь 3

Ирмос: Веселится о Тебе Церковь Твоя, Христе, зовущи: * Ты моя крепость, Господи, * и прибежище, и утверждение.

Взыграшася мысленно, яже в дому Божии шествия, Царя Христа хотяща плотию прияти.

Яко честныя Христу предъуготовльше днесь, вернии, дары приятны, хвалу, Сего с радостию усящем.

Ныне преиде сень и предыде истина, благодати пришедши, ныне подыми Христа, Симеоне.

Богородичен: Преста еже в сенех и образных начертаниих вещание: Истина бо, Чистая, Тобою явися концем.

Ин

Ирмос: Ты еси утверждение притекающих к Тебе, Господи, * Ты еси Свет омраченных, * и поет Тя дух мой.

Притушил еси силу гордаго, славный мучениче Христов, свыше одеявся силою.

Плотию обложен, шатания безплотнаго угасил еси врага и воплощеннаго Бога Слова проповедал еси.

Единым токмо пришествием твоим духи лукавствия отгоняются, Духа Святаго гоними благодатию.

Богородичен: Имея Тя помощь, не постыжуся, Пречистая Мати Божия, имея Тя предстательницу Жизни моя, спасуся.

Кондак мученика, глас 8.

Подобен: Яко начатки:

Тройческою твердостию * многобожие разрушил еси от конец, всеславне, * честен во Христе быв, и, победив мучители во Христе Спасителе, * венец приял еси мученичества твоего * и дарования Божественных исцелений, * яко непобедимь.

И седален, глас 4.

Подобен: Скоро предвари:

Болезнями, блаженне, наслаждаяся плотскими, * Божественную и неболезненную пищу достойно восприял еси, * венец безсмертия от Бога прием. * Темже и исцелений реки источаеши * любовию прибегающим, мучениче, в кров твой.

Слава, и ныне, предпразднства, глас 1.

Подобен: Камени запечатану:

Сокровище вечное Жизни всяческих, * мене ради под законом младенствовавший, * древле начертавый на скрижалех закон на горе Синайстей, * да вся измениши от законныя древния работы, * слава благоутробию Твоему, Спасе, * слава сошествию Твоему, * слава смотрению Твоему, Едине Человеколюбче.

Песнь 4

Ирмос: Вознесена Тя видевши Церковь на Кресте, * Солнце праведное, * ста в чине своем, * достойно взывающи: * слава силе Твоей, Господи.

На облаце носим светоноснем плотски, яко Солнце Правды, Божественныя зари Своя предлагает днесь и предозаряет храм Свой.

Предпразднственную хвалу Владыце Церковь днесь привношает, и Сего, яко Жениха, прияти светло готовится, и с Симеоном радуется; чини Ангельстии ужасошася, зряще на руках старческих со Отцем и Духом хвалимаго, яко Сына и Бога нашего.

Богородичен: Яко скинию, Тя, Преславная Богородице, хотящи прияти законная сень, закону Господа на руках носящую, Твоею осияшеся благодатию.

Ин

Ирмос: Услышах, Господи, * смотрения Твоего таинство, * разумех дела Твоя, * и прославих Твое Божество.

Зрящих удивил еси терпения, блаженне, твердостию: муки бо претерпел еси, яко в чуждем стражда телеси, мудре Трифоне.

Питался еси, блаженне, ранами болезней, биемь, ныне же наслаждаешися чистее, присносущныя славы насыщаяся.

Стружему телеси твоему железных ногтей остротою, вжиляшеся, чудне, твоя души крепость Божественною благодатию.

Богородичен: На Тя упование мое все возлагаю, Мати Дево: душу мою сохрани, яже Бога рождающая, Спаса моего.

Песнь 5

Ирмос: Ты, Господи, мой Свет, * в мир пришел еси, * Свет Святыи, обращающий из мрачна неведения * верою воспевающий Тя.

Тя, Господи, плотию церковь хотящи прияти, Божественною Твоею и неизреченною Божества зарею славно просвещашеся.

Тя, Господи, руками душевными сподоби прияти хвалящая Твое смотрение, и нас, верою поющих Тя, приими, яко Человеколюбец.

Тя, Господи, радостною душею приемлющая, плотию нас ради хотяща приити, сподоби с Симеоном благодарити Тя.

Богородичен: Избавльшеся Тебе ради сеновныя службы, Чистая, разумом истинным и верою твердою достойно Тя славим.

Ин

Ирмос: Утреннююще, вопием Ти: * Господи, спаси ны, * Ты бо еси Бог наш, * разве Тебе, иного не вемы.

Кумиры прелестныя упразднил еси, страсотерпче, токмо бо возлюбил еси Христову образу поклонятися.

Разумев пресветлую, славне страсотерпче, благодать Бога нашего, тоя ради пострадал еси.

Божественною озарився благодатию, усердно, страдальче, Христа ради пострадал еси.

Богородичен: **Н**еизреченно бысть зачатие Твое, и Рождество несказанно: пребыла бо еси Чистая Приснодева.

Песнь 6

Ирмос: **П**ожру Ти со гласом хваления, Господи, * Церковь вопиет Ти, * от бесовския крове очищися * ради милости от ребр Твоих * истекшею кровию.

Песни, якоже цветы, исплетше днесь, предъуготовим верою благодарения венец Божествен Владыце, мысленно приити хотящему.

Руки душевныя Богу уготовим, якоже Симеон старец, и в храм Божественныя славы Его приходяща, Того с веселием восприимем.

Творца веков старец яко Младенца прием, Бога Превечнаго разуме и Света языков во славу Израиля, Христа.

Богородичен: **П**ишуще Боговидно тростию духовною Тя, пророцы, Дево, храм, и сень, и Божественный дом Владыце всех, о Тебе украшахуся.

Ин

Ирмос: **О**чисти мя, Спасе, * многа бо беззакония моя, * и из глубины зол возведи, молюся, * к Тебе бо возопих, и услыши мя, * Боже спасения моего.

Изсушив мерзкия жертвы, и приношения скверная, и неистовства идольская, твоими кровьми, славне, напоил еси вся церковная благородная, Трифоне, прозябения.

Струпы мученичестии, яко миро, благоухают, кровь страдалец источает исцеления, останцы же тела души освящают верою касающихся им.

Богородичен: **Я**ко одушевлен кивот, прияла еси Слово Безначальное, яко Святое Святилище, Зиждителя вместила еси, яко Престол огнезрачен, носиши Владыку, Богомати, всея твари.

Кондак, глас 6:

Со Отцем Слово Сый невидимо, * ныне убо видим есть плотию: * неизреченно от Девы родися * и на руку старчу дается святителю. * Поклонимся Тому * истинному Богу нашему.

Икос: **С**вященная трапеза предлагается, * празднолюбных собор днесь, предпразднственная носящи знаменья, * Господа четыредесятидневна, из Девы страшное рождество, * и старца честнаго объятие, * и честна страдальца память, * предпразднственныя хвалы припевающе * истинному Богу нашему.

Песнь 7

Ирмос: **В** печи Авраамстии отроцы персидстей, * любовьию благочестия паче, * нежели пламенем, опаляеми, взываху: * благословен еси в храме славы Твоея, Господи.

Церковь, предъукрашшия зарею мысленною, любовию Владыки всех и Творца, воспряти Его готовится и радостная Сему плетет восхождения.

Иже в недрах неописанно суца Отческих Слово, Сына Своего Единороднаго, Матернии руде носящий в церковь плотию по закону яко Младенца вносят.

Вселивыйся Бог во чрево Девы на руках Симеона, яко на престоле огненнем, днесь седит.

Богородичен: Видеша славу Твою языцы вси, Едина Чистая, темже тварей всех Тя благочестно Царицу ублажают и Богоматерь паче естества непрестанно славят.

Ин

Ирмос: От Иудей дошедше, отроцы, * в Вавилоне иногда * верою Троицескою пламень пещный попраша, поюще: отец Боже, благословен еси.

Венценосец, ликуеши с лики мученик, веселяся, прелесть бо победив словом истинным, воспеваеши, радуяся: отец наших Боже, благословен еси.

Владыка всяческих Своими страданьми венчает мученика и сего водворяет в селех Небесных, зовуща и глаголюща: отец наших Боже, благословен еси.

Богородичен: Млада носящи Младенца, прежде всех век Бога, Всенепорочная, из Тебе воплощенна, на престаи молящи спасти поющия: отец наших Боже, благословен еси.

Песнь 8

Ирмос: Руце распростер, Даниил * львов зияния в рове затче: * огненную же силу угасиша, * добродетелию препоясавшися, * благочестия рачители, отроцы, взывающе: * благословите, вся дела Господня, Господа.

Руце распростер Симеон и предъочищ душу Божественными деяньми, младенствовавшего Господа токмо за благодать прият, вопия с веселием Ему: благословите, вся дела Господня, Господа.

Свет благодати Христовы просия нам, хотя ввести в храм Свой, всесеновная начертания претворяя яко Обновитель воистинну вопиющим: благословите, вся дела Господня, Господа.

Предвечнаго Бога, благоволившаго нас ради младенствовати и на руках приемлема быти старца Симеона, благословите, вся дела Господня, Господа.

Богородичен: Иже за благодатьню многую вочеловечься Христос из Тебе, Пречистая, нас ради, приятна днесь Отцу приношает очищения, Един Сый Пречист и Пренепорочен и Тя Едину Чистейшую соблюдая Пресвятую.

Ин

Ирмос: Седмерицею пещь * халдейский мучитель, * Богочестивым неистовно разжже; * силою же лучшею спасены, сия видево, * Творцу и Избавителю вопияше: * отроцы, благословите, * священницы, воспойте, * людие, превозносите во вся веки.

Даже до усекновения и опаления, даже до кровепролития, даже и до смертныя кончины пострадал еси, сопротивляяся противу греху, мучениче Христов, ныне же, жизнь во Христе сокровенную прием, взываеши: священницы, благословите, людие, превозносите во вся веки.

На земли подвизался еси, с нечестивыми борясь, противу лестней и богоборней лести горце нудящим; на Небесех же, Трифоне, наслаждаешься, венец нося, и со Ангелы ликуеши, поя: отроцы, благословите, священницы, воспойте, людие, превозносите Господа во веки.

Мучительское изблещил еси безбожие, всемудре, и демонское богоборство угасил еси струями кровей твоих; в Троице Единого Бога достолепне и чисте возвещая и чествуюя, взывал еси: отроцы, благословите, священницы, воспойте, людие, превозносите во вся веки.

Богородичен: Глаголом Твоим последующе, ублажаем, Пречистая, Тя, Блаженную, плотию рождшую воистинну Блаженного, Света живущаго незаходимаго, и Светонаставника, и Светодавца Владыку. Егоже отроцы благословят, священницы воспевают и превозносят во вся веки.

Песнь 9

Ирмос: Камень нерукосечный * от несекомья горы Тебе, Дево, * краугольный отсечся, * Христос, совокупивый разстоящая естества; * тем, веселящся, Тя, Богородице, величаем.

Душевными Тя руками сподоби мя, Благодетелю, восприяти, якоже древле Симеон, и насладитися Твоя благасти: Ты бо еси Един желание и сладость, Превозжеленный.

Мысленно вжешче вси добродетелей свещи, любовию с Симеоном и Анною свещеносцы предусрящем, Христу хотящу приити освятити поющия Его.

Днесь в храме Симеон старец руками прият Христа, Бога нашего, и возопи, глаголя: ныне отпускаеши раба Твоего, Владыко.

Богородичен: Паче сущих восприят из Тебе плоть Слово Вышняго, Чист Сый приношает Безначальному Отцу очищение и очищает любовию Тя, Божию Матерь, величающия.

Ин

Ирмос: Тя, неискусобрачную Матерь Бога Вышняго, * Тя, паче ума рождшую словом воистинну Бога, * вышшую Пречистых сил, * немолчными славословении величаем.

Паче видимых мученическое чаяние полно безсмертнаго наслаждения: видится сих надежда, полна благоухания, и радости, и светлости неизреченная. Темже достойно ублажаются.

Свет был еси второй, к Свету первому приближився, зарею Его просвещаемь и воображаемь, Трифоне мудре, и Того подательными светлостьми сияя; тем тя вси ублажаем.

Явился еси неужасен в подвизах, страсотерпче, явился еси истинно тезоименит Божественней и святей пици, еяже ныне восприемля и ясно наслаждайся, спасение чтущим тя нам испроси.

Богородичен: Умертви мудрование, Богородительнице, плоти моя и оживи душевное умерщвление действием Истинныя Жизни, из Тебе рождшиися плотию за неизреченное благоутробие и спасение поющих Тя.

Светилен.

Подобен: Духом во святилищи:

Пищи наслаждаяся преславныя и Божественныя, * Ангелом единокитель был еси, блаженне: * гуси пасый в лужех, от Бога приял еси благодать исцелений, * Трифоне великомучениче, * исцеляти человеческия немощи и недуги.

Слава, и ныне, предпраздства:

Отроча принесши Всенепорочная Отроковица во святилище * совершити яже по закону, * и Сие на руки яко прият Симеон праведный, * противу изрече Девице: * Сей лежит на падение и на востание многим * и во знамение в мире.

На стиховне стихиры предпраздства, глас 2.

Подобен: Доме Евфрафов:

Скверны кроме, * Христос раждается от Девы, * яко от Отца нетленно * Сын прежде денницы, * Адама избавляяй.

Стих: Ныне отпущаеши раба Твоего, Владыко, * по глаголу Твоему, с миром.

Двери Небесныя, отверзитеся, * Христос бо в церковь * яко Младенец * Материю Девою * Богу и Отцу приносится.

Стих: Свет во откровение языков * и славу людей Твоих Израиля.

Восприими, о Симеоне, * Господа славы, * якоже ти известися * от Духа Святаго: * се бо прииде.

Слава, и ныне, глас тойже:

Самогласен: Зиждатель Небесе и земли * на руках ношашеся святым Симеоном старцем днесь. * Той бо Духом Святым глаголаше: * ныне свободихся, * видех бо Спаса моего.

НА ЛИТУРГИИ:

Блаженны от канонов, предпразднства песнь 3-я, и святаго песнь 6-я.

Взыграшася мысленно, яже в дому Божии шествия, Царя Христа хотяща плотию прияти. [Дважды]

Яко честныя Христу предъуготовльше днесь, вернии, дары приятны, хвалу, Сего с радостию усрящем.

Ныне преиде сень и преыде истина, благодати пришедши, ныне подыми Христа, Симеоне.

Изсушив мерзкия жертвы, и приношения скверная, и неистовства идольская, твоими кровьми, славне, напоил еси вся церковная благородная, Трифоне, прозябения. [Дважды]

Слава: Струпи мученичестии, яко миро, благоухают, кровь страдалец источает исцеления, останцы же тела души освящают верою касающихся им.

И ныне: Богородичен: Яко одушевлен кивот, прияла еси Слово Безначальное, яко Святое Святилище, Зиждителя вместила еси, яко Престол огнезрачен, носиши Владыку, Богомати, вся твари.

Тропарь предпразднства, глас 1.

Небесный лик Небесных Ангел, * приник на землю, пришедше зрит яко Младенца, * носима к храму, Перворожденна вся твари от Матере Неискусомужныя, * предпразднственную убо с нами поют песнь, радующесея. [Дважды]

Тропарь святаго, глас 4:

Пици Божественныя, треблаженне, * наслаждаяся на Небесех неоскудно, * славящих песньми память твою покрый * и сохрани от всякия нужды, * отжени вредящих нивам животных, * да тебе от любве вопием всегда: * радуйся, Трифоне, мучеников укрепление.

Кондак мученика, глас 8.

Тройческою твердостию * многобожие разрушил еси от конец, всеславне, * честен во Христе быв, и, победив мучители во Христе Спасителе, * венец приял еси мученичества твоего * и дарования Божественных исцелений, * яко непобедимь.

Кондак предпразднства, глас 6:

Со Отцем Слово Сый невидимо, * ныне убо видим есть плотию: * неизреченно от Девы родися * и на руку старчу дается святителю. * Поклонимся Тому * истинному Богу нашему.

Прокимен, глас 7: Прокимен, глас 7: Возвеселится праведник о Господе, * и уповает на Него.

Стих: Услыши, Боже, глас мой, внегда молити ми ся к Тебе.

Апостол к Римляном, зачало 99.

Братие, вемы, яко любящим Бога вся поспешествуют во благое, сущым по предведению званым. Ихже бо предуведе, тех и предустави сообразных быти

образу Сына Своего, яко быти Ему первородну во многих братиях. А ихже предустави, тех и призва, а ихже призва, сих и оправда, а ихже оправда, сих и прослави. Что убо речем к сим, аще Бог по нас, кто на ны, Иже убо Своего Сына не пощаде, но за нас всех предал есть Его, како убо не и с Ним вся нам дарствует? Кто поемлет на избранныя Божия, Бог оправдаит. Кто осуждаяй? Христос Иисус умерый, паче же и воскресый, Иже и есть одесную Бога, Иже и ходатайствует о нас. Кто ны разлучит от любви Божия, скорбь ли, или теснота, или гонение, или глад, или нагота, или беда, или мечь? Якоже есть писано: яко Тебе ради умерщвляеми есмы весь день, вменихомся якоже овцы заколения. Но во всех сих препобеждаем за Возлюбльшаго ны. Известихся бо, яко ни смерть, ни живот, ни Ангели, ни Начала, ниже Силы, ни настоящая, ни грядущая, ни высота, ни глубина, ни ина тварь кая возможет нас разлучити от любви Божия, яже о Христе Иисусе Господе нашем.

Аллилуия, глас 4: Праведник яко финикс процветет, яко кедр иже в Ливане умножится.

Евангелие от Луки, зачало 51, от полу:

Рече Господь Своим учеником: се, даю вам власть наступати на змию и на скорпию и на всю силу вражию, и ничесоже вас вредит. Обаче о сем не радуйтесь, яко дуси вам повинуются, радуйтесь же, яко имена ваша написана суть на небесех. В той час возрадовася духом Иисус и рече: исповедаются, Отче, Господи небесе и земли, яко утаил еси сия от премудрых и разумных, и открыл еси та младенцем, ей, Отче, яко тако бысть благоволение пред Тобою.

Причастен: В память вечную: